

Ngën-gi-woy

Le livre du Cantique des Cantiques en wolof

traduit de l'hébreu et publié par

la Mission Baptiste du Sénégal

B.P. 8408, 14523 Dakar

B.P. 1229, 23022 Thiès

Traduction provisoire

Droit de reproduction © 2013 Mission Baptiste du Sénégal

Tous droits réservés.

Quiconque voudrait le reproduire devra inclure la déclaration de droit d'auteur ci-dessus.

Pour la reproduction en plus de 250 exemplaires, veuillez écrire à l'adresse suivante:

B.P. 1229 — Thiès, Sénégal

Ku ko bégga sotti, na ci boole kàdduy sañ-sañu boroom yii:

"© 2013 Mission Baptiste du Sénégal."

Ku ko bégga sotti lu ëpp 250 yoon, na bind ci :

B.P. 1229 — Thiès, Sénégal

Pour mieux lire ce livre...

L'alphabet officiel dont on se sert est facile à lire. Les seuls symboles qui présentent une certaine difficulté sont les suivants:

| | | | |
|---|----------------|-------------|-------------|
| j | se trouve dans | la paix | --jàmm (ji) |
| | et | dernier | --muuj |
| c | se trouve dans | le couscous | --cere (ji) |
| | et | descendre | --wàcc |
| ñ | se trouve dans | tous | --ñépp |
| | et | refuser | --bañ |
| x | se trouve dans | savoir | --xam |
| | et | la main | --loxo (bi) |
| ë | se trouve dans | l'œil | --bèt (bi) |
| | et | demain | --ëllëg |
| ŋ | se trouve dans | la mâchoire | --ŋaam (wi) |
| | et | seulement | --doŋŋ |

Une différence existe entre **a** et **à**

| | | | |
|-------------|------------|-------------|--------|
| baigner | --sang | revêtir | --sàng |
| l'encensoir | --and (bi) | accompagner | --ànd |

La voyelle est **doublée** pour indiquer la longueur

| | | | |
|-------------|------------|------------|--------|
| valoir | --jar | passer par | --jaar |
| être propre | --set | chercher | --seet |
| le cœur | --xol (bi) | regarder | --xool |
| le nom | --tur (wi) | répandre | --tuur |

La voyelle est **accentuée** pour indiquer la fermeture

| | | | |
|--------|--------|------------|--------|
| souper | --reer | être perdu | --réer |
| jeûner | --woor | être sûr | --wóor |

Li nuy bëgga lim lu nu tëral la, bëgg cee déggook bokki jàngkat yu tedd yi,
ngir déggin wi leer, ba deesu ko jaawatle.

Nanu ràññee...

nanu ak nañu

Dees na wax: «(Nun) war nañoo dem» (**n** bi am maas bii: ~).

Waaye danu koo taamoo binde nii:

«(Nun) war **nanoo** dem,»

ngir ñu bañ koo jaawatleek: «War nañoo dem (ñoom).»

naa ak na

Bu loolu weesoo, dees na wax: «(Moom) war naa dem.»

Waaye danu koo taamoo binde nii:

«(Moom) war **na** dem,»

ngir ñu bañ koo jaawatleek: «War **naa** dem (man).»

leen ak léen

Te it dees na wax, «Bëgg nanu leen (ñoom).»

Waaye danu koo taamoo binde nii:

«Bëgg nanu **léen** (ñoom),» (**léen** am maas bii: ´)

ngir ñu bañ koo jaawatleek: «Bëgg nanu **leen** (yéen).»

Noonu:

Yéen ñi gëm, Yàlla musal na **leen**.

Ñoom ñi gemul, Yàlla rëbb na **léen**.

Boo gisee màndarga mii --- , xamal ne kàddu gee yeggul. Dafa dog, mbaa
muy wax ju ñu junj rekk.

Mbind yi ñu ràññale ak yi ñu dijjal, boddul ci mbindum Yàlla mu sell, mi
ñu jukkee ci téere yu jëkk ya.

Boo gisee baat bu ñu tofal araf bu tuuti bu mel nii **a**, seetal lu muy tekki ci
suufu xët mi.

Boo gisee tomb bii ° ci boppu baat, seetal lu muy tekki ci *Leeral yi*, fi téere
biy waaja jeexe.

Ngën-gi-woy

1 ¹ Lii, di ngën-gi-woy, ñeel Suleymaan.

Ndaw si

² Foon maa, ngalla foon ma,
sa cofeel a ma dàqal biiñ.

³ Sa diw yi ngay xeeño neex,
saw tur jib, mel ni lu xeeñ a xelli.
Moo tax janq ji nob la.

⁴ Yóbbaaale ma, nu daw, dem.
Sama buur, yóbbu ma sa néeg,
nu bokk mbég ak bänneex,
di tàqamtikoo sa cofeel gi dàq biiñ.
Ñoo yey nob la!

Njèkke ñooru, mujje xejjoo

Ndaw si

⁵ Yéen janqi Yerusalem, damaa ñuul, rafet;
ñuul ni xayma ya ca Kedar^a,
mel ni ridoy Buur Suleymaan.

⁶ Buleen ma xoole sama ñuulaay bi,
jant bee ma lakk.
Samay càmmiñ a ma mere,
di ma wattuloo tóokëri reseñ ya,
te wattuwuma sama tóokëri bopp^b.

⁷ Sama soppey xol, ngalla wax ma
ana fooy foral,

^a **1.5 Kedar** diiwaanu Arabi la woon bu genn giiru Ismayla dèkke woon bu yàgg. Dañu daan defare seeni xayma ay deri bëy yu ñuul.

^b **1.6 tóokër** ak càmm ay baat la yu ñuy mengalee ndaw si ci waxin. Seetal it ci 1.8.

di fa gooral, digg bëccëg?
 Lu ko moy may muuru, di la wër
 fi say xarit ak seeni gétt.

Waa ji

⁸ Aa! Xamoo koo?
 Yaw mi dàq ci jigéen ñi!
 Génnal rekk, topp wewi jur gi,
 sàmmi say tef,
 fi dendeek mbaari sàmm si.

⁹ Xarit, xam nga lu ma lay xoole?
 Yànjaayu wajan wu takk watiiru Firawna.
¹⁰ Sa lex yaa ngi tàkk fi digg sàdd yi!
 Céy wii loos ak caqu peram!
¹¹ Sàddi wurus lanu lay defaral,
 tapp ca xaalis.

Ndaw si

¹² Li sama buur tëdd, di xéewlu lépp,
 maa ngi gilli lu neex.
¹³ Sama nijaay di mbuusum ndàbb
 may fanaan sama digg ween.
¹⁴ Saa nijaay, saa cabbu tóor-tóoru fuddën,
 fa digg tóokëri Engedi^c.

^c 1.14 *tóokëri Engedi* bëtu ndox la bu nekk ca sowub géēju Xorom ga. Engedi di tekki «bëtu ndoxu bëy».

Waa ji

¹⁵ Xarit, yaaka rafet,
yaaka taaru!
Say gët niy pitax.

Ndaw si

¹⁶ Nijaay, yaaka góorayiw,
yaaka maa neex!
Mbooy gu naat, nu laloo,
¹⁷ garabi seedar di sunu xànqi néeg,
garab gu dul ruus xadd ko^d.

2 ¹ Waaye man saxayaayu joor donḡ laa,
nirook as tóor-tóor ciw xur.

Waa ji

² Xanaa as tóor-tóor su ne ràññ ci biir i dég!
Kookooy sama xarit ci biir janq ji.

Ndaw si

³ Mbete garab gu gëna neex ci gott bi,
kookooy sama nijaay ci biir xale yu góor yi.
May bége keppaaram, safoo doom ya.
⁴ Dugal na ma néegub sago-jeex-na,
yiire ma mbëggeel.
⁵ Gaaweleen ma nàkki reseñ, ma dëgër,
leel-leen may meñneef, leqlee ma.
Wopp laa def ndax mbëggeel!
⁶ Sama càmmoñu waay, ma gegenoo,
ndijooram, ma laxasoo.

^d 1.17 *seedar* ak *garab gu dul ruus* ay garab lañu yu neex xet.

⁷ Yéen janqi Yerusalem, waatal-leen ma
 ci taaru kéwél ak koobay àll bi,
 ne dungeen dakkal te dungeen sooke tëraayu mbëggeel
 te jotul.

Wootante jib na

Ndaw si

⁸ Dégluleen, sama nijaay a,
 mu ngooguy ñëw,
 di xéluy jéggi tund yu ndaw yi,
 di tëb tund yu mag yiy dikk.
⁹ Sama nijaay a ngi mel ni kéwél,
 mbaa kooba gu ndaw.
 Mu ngi noonu taxaw ca gannaaw miir ba,
 di séentu ci palanteer bi
 ak a yër ci caax bi.

¹⁰ Sama nijaay ne ma:
 «Xarit, ayca,
 jongama sama, dikkal boog!
¹¹ Xoolal, tawu sedd bi wees na,
 waame jàll, wéy^e.
¹² Tóor-tóor yi lal na réew mi,
 jamonoy woy dikk,
 sabum pégét^f jibe sunum réew.
¹³ Figg a ngi ñorsi,
 reseñ tóor, di gilli.

^e 2.11 Ci Israyil, jamonoy sedd day taw. Bu taw bi jeexee, tàngoor wi dikk, gàncax gi jebbi, daldi naat.

^f 2.12 *pégét* xeetu picc la mu nirool pitax.

Xarit, ayca,
jongama sama, dikkal boog!»

Waa ji

¹⁴ Soppe, sore nga ni xati mu dëkk ci doj,
làqoo ruqi mbartal yi.
Won ma sa jëmm,
dégtal ma sa baat.
Sa baat a neex,
sa jëmm jekk!

Ndaw si

¹⁵ Jàppal-leen ma till yi,
till yu ndaw yiy ruur reseñ,
te sunu reseñ jiy tóor.

¹⁶ Sama nijaay, maa moom, man it, moo moom,
di fore digg tóor-tóor yi.

¹⁷ Nijaay, balaa jant a fenk,
ker toxu,
dellul gaaw ni kéwél,
mbaa kooba gu ndaw kaw tund yu xàjjalikoo ya.

Réeroo, gise

Ndaw si

3 ¹ Sama kaw lal, guddi,
laa seet sama soppey xol.

Seet naa ko, gisuma ko.

² Naa jóg, wër dëkk bi. Mbedd yeek pénc yi
laay seete sama soppey xol.

Seet naa ko, gisuma ko.

³ Wattukat yee ma gis,

ba ñuy wër dëkk bi.

Ma ne léen: «Sama soppey xol, gisuleen ko?»

⁴ Ma romb léen tuuti rekk,

gis sama soppey xol.

Ma ne ko taral, bàyyeetuma ko,

ba yóbbu ko sama kër yaay,

ba sama biir néegu ndey ji ma jur.

⁵ Ngalla yéen, janqi Yerusalem, waatal-leen ma

ci taaru kéwél ak koobay àll bi,

ne dungeen dakkal te dungeen sooke tëraayu mbëggeel

te jotul.

Daagu, jëm toolu mbëggeel

Ñeneen

⁶ Ana luy jóge màndiñ ma nii,

mel ni taxaaru saxar,

suuroo ndàbb ak xas mu xeeñ

ak mboolem cuuraayi jula?

Ndaw si

⁷ Laltub Suleymaan a ngoog,

juróom benn fukki jàmbaar dar ko,

di jàmbaari Israyil.

⁸ Ñépp mane saamar,

ku ci nekk mokkal xare,

saamar ci pooj,

ngay fàggu mbettum guddi.

⁹ Ab toogu la Buur Suleymaan defarlu,

ñu defare ko bantu Libañ,
¹⁰ ponku ya, mu def ko xaaalis,
wéeruwaay ba wurus;
tooguwaay ba di ndimo lu xonq curre,
biir ba di liggéeyu ràbb
bu janqi Yerusalem ràbbe cofeel.

¹¹ Yéen janqi Siyon, génnleen,
xool Buur Suleymaan ak mbaxanam céetal
mi ko yaayam solal ci bésub céetalam,
bésu bânneexam.

Waa ji

4 ¹ Yaaka rafet, xarit, yaaka taaru!
Sa gët yi niy pitax, làqoo muuraay bi,
njañ liy loy-loyee ngi saf géttu bëy yu ñuul
yu bartaloo kaw tundu Galàdd.

² Sa gëñ yi weex ni xar yu ñu wat
ñuy yéegé ca sangukaay ba,
ku nekk ak seexam,
kenn wéetu ca.

³ Sa tuñ yi mel ni wëñ gu xonq curre,
ndaw gémmiñ gu jekk!
Sa lex yiy tàkk ni ñaali gërënaat,
làqoo sa muuraay bi;

⁴ sa loos wi ne coleet ni tatay Daawuda,
mërgalu ba jekk,
caq bay lang ni junniy kiiraayi jàmbaar.

⁵ Sa ween yi ni ñaari tef,
mbaa seexi kéwél yuy fore digg tóor-tóor yi.

⁶ Balaa jant a fenk,
 ker gàddaay,
 ma ne coww diggante tund wa ndàbb ne bann,
 ak tund wa xas ma neexe.

⁷ Xarit, sa lépp a rafet,
 sikk nekkul ci yaw.

⁸ Séet sama, jógeel Libañ, jege ma,
 bawool Libañ, jegesi ma.
 Wàcceel colli Amana
 ak colli Senir ak Ermon.
 Génnal xunti gaynde yooyook
 tundi segg ya.

⁹ Jigéen sama, séet sama, benn yoon nga ma xool,
 sama fit ne tërit.
 Sa benn peru caq rekk,
 sama fit ne tërit.

¹⁰ Jigéen sama, séet sama,
 sa mbëggeel a neex!
 Sa mbëggeel a dàq biiñ,
 sa diw yu xeeñ dàq luy cuuraay.

¹¹ Séet sama! Lem ay xellee sa gémmin,
 lem ak meew lal sa làmmiin.
 Sa xetu yére xetu àllu Libañ la.

¹² Jigéen sama, séet sama, yaay tóokër bu tëje,
 yaay seyaan bu tëje,
 di bētu ndox bu saañe.

¹³ Yaa di toolu gërënaat bu naat,

meññ ngën-gi-meññeef
 ak fuddën ak reen yu xeeñ,
¹⁴ muy reen yu xeeñ, safron, barax, kanel,
 ak xasoo xas mu xeeñ,
 ndàbb ak alowes
 ak lépp lu xeeña xeeñ.
¹⁵ Yaa di bëtu ndox ci tool yi,
 di teen bu fees ak ndox muy daw,
 wale tundi Libañ.

Ndaw si

¹⁶ Yaw, ngelawal bëj-gànnar, yewwul,
 ngelawal bëj-saalum, dikkal,
 wolal-leen ma sama tool bi,
 mu gilli;
 sama nijaay dugg toolam,
 xéewloo ngën-gi-meññeefam.

Waa ji

5 ¹ Jigéen sama, séet sama, dikk naa sama tool,
 sama ndàbb ak sama cuuraay, ma for,
 sama lem xelli, ma lekk,
 sama biiñ ak sama meew, ma naan.

Awu

Yéen soppe yi, lekkleen;
 yéen ñi bëggante, naanleen ba màndi.

Xol jeex na, mujje neex*Ndaw si*

² Maa ngi nelaw, te xol yewwu;
dégluleen, sama nijaay ay fëgg.

Mu ne: «Xaritoo, jigéen sama, ubbil ma,
sama nenne, alal sama!

Sama bopp a ngi laye ba tooy,
njañ li fanaanee guus.»

³ Ma ne ko: «Summiku naa de,
xanaa duma soluwaat?

Jàngu naa jeeg,
xanaa duma taqati?»

⁴ Sama nijaay yoor loxoom ci xarante bi,
sama yaram ne sàyy.

⁵ Ma ne bërét, di ubbil nijaay,
sama yoxo yi, diwu ndàbb di ca siit,
sama waaraam yi, ndàbb rogalaat
ba ci njàppul bunt bi.

⁶ Maa ubbil nijaay,
waaye nijaay waññiku na, ba wéy.

Ba mu waññikoo, tuuti ma dee.

Seet naa ko, gisuma ko;

ma woo ko, wuyuwul.

⁷ Wattukat yiy wër dëkk bi gis ma;

ñu dóor ma, gaañ ma,

ñori sama malaan.

Wattukati tata jaa!

⁸ Ngalla yéen, janqi Yerusalem, waatal-leen ma
ne su ngeen gisee sama nijaay,
ne ko damaa wopp ndax mbëggeel.

Janqi Yerusalem

⁹ Yaw mi dàq ci jigéen ñi,
ana lu sa nijaay gëne keneen?
Ana lu mu ëpplee keneen,
ba nga di nu waatloo lii?

Ndaw si

¹⁰ Sama nijaay daa xees, leer;
kenn la ci fukki junniy góor.
¹¹ Kanam gi ni wurus, di wurusu ngalam;
njañ li lëmësu,
ñuul ni ndobin.
¹² Gët yi ni pitax yu feggook wali ndox,
sangoo meew,
feggook ndox mu ne xéew.^g
¹³ Lex ya di tool,
gàncax ga ne ca bann,
tuñ ya diy tóor-tóor,
ndàbb wale ca, rogalaat.
¹⁴ Yoxo yi banti wurus la,
ngën-gi-per tappe ca;
jëmm ja rattax ni bëñu ñay
laloo peri safiir;
¹⁵ yeel yi kenuy doj wu jafe la,
sampe ci tàñki wurusu ngalam.

^g 5.12 Li ñu wax fii ci làkku ebrë am na werante.

Meloom ni tundi Liban,
 di tãneef ni garabi seedar.
¹⁶ Gémmiñam, bãnneexi neen,
 jëmmam jépp jara xédd!
 Yéen janqi Yerusalem,
 sama nijaay a ngoog, samab xarit.

Janqi Yerusalem

6 ¹ Yaw mi dàq ci jigéen ñi,
 ana fu sa nijaay dem?
 Wax nu fu sa nijaay jaar,
 nu seetle la ko.

Ndaw si

² Sama nijaay dugg na biir toolam,
 fa gàncax ga ne bann.
 Mu ngi foral ci tool bi,
 ak a fori tóor-tóor.
³ Man, nijaay a moom;
 nijaay it, maa moom.
 Mooy fore sama digg tóor-tóor yi.

Yaaka taaru

Waa ji

⁴ Xarit, taaru nga ni Tirsa ak Yerusalem,
 péeyi buur ya,
 yéeme nga ni péey yu kawe ya!
⁵ Wuy, geesul fee!
 Soo ma nee jàkk, ma jànnaxe.
 Sa njañ liy loy-loyee ngi saf géttu bëy yu ñuul,
 yu bartaloo kaw tundu Galàdd.

⁶ Sa gëñ yi ni mbote yu weex,
 yéege ca sangukaay ba,
 ku nekk ak seexam,
 kenn wéetu ca.

⁷ Sa lex yiy tàkk ni ñaali gërënaat,
 làqoo sa muuraay bi.

⁸ Buur day am juróom benn fukki lingeer
 ak juróom ñett fukki jongama
 ak jeeg ju dul jeex.

⁹ Waaye sama nenne kenn la, matal ma sëkk,
 yaayam kennal ko,
 muy ngëneelu biiru yaayam.

Janq ji gis ko, di ko jëwe mbégteem,
 lingeeri buur ak i jongamaam di ko kañ.

¹⁰ Ña nga naa: «Ndaw sii ku mu?
 Bu nee xiféet, nga ne fajar a xar,
 rafet ni leer gu ndaw,
 yànj ni jant bi,
 yéeme ni gàngoori biddiww!»

¹¹ Damaa wàcc ba ca toolu saal ya,
 xooli cax mu yees mi ci xur wi,
 bu reseñ ji jebbee,
 mbaa gërënaat ji tóor, ma gis.

¹² Damaa ràkkaaju bay lox,
 mel ni ku war watiiru buur^h.

Janqi Yerusalem

7 ¹ Dikkal, janqu waa Sulam bee, dikkal;
 dikkala dikk, nu niir la.

^h 6.12 Li ñu wax fii ci làkku ebrë am na werante.

Waa ji

Moo, lu ngeen di seetaane janqub waa Sulam bi
ni kuy fecc galanu Ñaari Dali Xare?

² Janqoo, lingeer sama,
sa tànk yee ka jekk ci sa dáll yi,
sa mooco yi mërgalu niy jaaro
yu ndaanaanu tëgg yette loxoom.

³ Sa jumbux bi di kaas bu mërgalu,
yàlla bumu ñàkk biiñu njafaan!
Sa biir bi di jalu pepp
mu ay tóor-tóor ñag.

⁴ Sa ween yi ni ñaari tef,
mbaa seexi kéwél.

⁵ Sa loos wi, coleet, rattax, ni tatay bëñi ñay;
say gët di lerxat ni déegi Esbon,
ya feggook buntu Bat Rabim.
Sa bakkan bi jub xocc ni tatay Liban
ja tiim Damas.

⁶ Sa bopp siggi ni tundu Karmel,
njañ liy nes-nesi ni sooyu buur,
létt yay fëy-fëyi, ba laaw buur.

⁷ Rafet, sopploo!

Soppee, bänneex nga!

⁸ Sa taxawaay bii garabu tàndarma la,
sa ween yi di cëggi doom ya.

⁹ Ma ne, maay yéeg tàndarma gi,
ñëb doom yi.

Yal na say ween di sama cëggi reseñ,
 sag noo jox ma doom yu xeeñ,
¹⁰ sa gémmin di xelli ngëneelu biiñ.

Ndaw si

Na walal sama nijaay,
 tuurul ñiy nelaw.
¹¹ Man, nijaay a moom,
 te maay nammeelam.

Ayca ca tool ba

Ndaw si

¹² Nijaay, ayca nu dem tool ba,
 fanaani ca tóor-tóori fuddën yaⁱ.
¹³ Nan teela xëyi ca tóokëri reseñ ya,
 bu reseñ ji jebbee,
 mbaa tóor-tóor yi focci,
 mbaa gërënaat ji tóor, nu gis.
 Fa laa lay jébbale mbëggeel.
¹⁴ Tóor-tóor yu xeeñ^j yaa ngi gilli,
 lépp luy doom yu neex aje sunu bunt néeg,
 yu yees yaak ya woon,
 ma boole dencal la, nijaay.

8 ¹ Éy su meloon ni sama càmmiñ nga,
 mel ni ku ma bokkal wenn ween,
 ba ma dajeek yaw biti, sañ laa dar,
 te du tax ñu sikk ma!

² Ma jàpp la, yóbbu sama néeg yaay,

ⁱ 7.12 Mbaa ca dëkk yu ndaw ya.

^j 7.14 *tóor-tóor yu xeeñ yi* màdaragoor la ci làkku ebrë. Ñu yaakaar ne, day may góor doole tey giiral jigéen.

moom mi ma yar,^k
 ma may la biiñ bu saf,
 ak sama ndoxum gërënaat, nga naan.
³ Sama càmmoñu waay, ma gegenoo,
 ndijooram, ma laxasoo.
⁴ Yéen janqi Yerusalem, waatal-leen ma
 ne dungeen dakkal te dungeen sooke tëraayu mbëggeel
 te jotul.

Joxe naa xol

Janqi Yerusalem

⁵ Ana ndaw suy jóge màndiñ ma nii,
 wéeroo nijaayam?

Ndaw si

Ci ron pom gi laa la yee,
 fa la sa yaay jàppe ëmb,
 jur la fa.
⁶ Teg ma ci sa xol ni torlukaay^l,
 mbaa ci sa përeg ni lamu màndarga.
 Mbëggeel a bare doole ni ndee,
 fiiraange xér ni bàmmee.
 Day jàpp jippét,
 di jum bu Aji Sax ji taal.^m
⁷ Ndox mu ne xéew du fey mbëggeel,
 ay dex du ko mëdd.
 Ku koy weccee sa alalu kër gépp it,
 ñu jéppi laa jéppi rekk.

^k 8.2 Mbaa nga jàngal ma baane,

^l 8.6 *torlukaay* mooy jumptukaay bu mel ni lu ñuy tàmponee.

^m 8.6 Mbaa tàkk di sël-sëli.

Càmmiini ndaw si

⁸ Sunub jigéen lu ndaw la,

ween sax amu ko.

Lu nuy defal sunub jigéen

bés bu ñu koy béggsi?

⁹ Su doon am tata,

nu tabaxal ko soorooru xalis.

Su doon bunt,

nu aare ko xànqi seedar.

Ndaw si

¹⁰ Maa dim tata,

sama ween di sooroor ya;

moo tax waa ji xam ne

maa di jàmmam.

¹¹ Suleymaan am na reseñ ca Baal Amon.

Da koo dénk ay beykat.

Ku nekk di ko fey meñneef ma

junniy dogi xalis.

¹² Junniy dogi xalis yi,

Suleymaan, yaa ko moom;

ñaar téeméer yi, beykat yi.

Waaye sama toolu reseñ, maa ko moom.

Waa ji

¹³ Yaw mi tooge digg tool bi,

samay xarit a ngi teewlu sa baat,

waxal boog, ma dégg.

Ndaw si

¹⁴ Nijaay, dawsil,
melal ni kéwél,
mbaa kooba gu ndaw
ci kaw tund wi ci gàncax gu xeeñ gi.

